

# Fasnacht 2014



## Sujet 2014: Ändstazioon Reeperbahn

Wottschi vo dr BVB e Uffdraag bikoo und mit ne Gschäftli mache,  
goosch nach Hamburg uf d'Reeperbahn s'isch zum Lache.  
Zwüsche schöne Wiiber und guete Gsoff kasch se gsee,  
d'Heere vo dr Fierigsetasche und anderi Mitarbäiter vo dr BVB.  
Ändstazioon Reeperbahn, das hän mir uns als Sujet ussdänggt,  
Fueter liifere d'Scheffe vo de griene Drämmli, s'isch gschänggt.  
Deals mache z'Hamburg das isch käi Problem für d'Schwoobe,  
d'Koleege us Basel ins Buff iilaade, scho wird dr Uffdraag gschoobe.

Es schafft e hübschi Daame bi dr BVB, mir nenne se emool s'Lotti,  
die griegt regelmässig vom Baumi per MMS schliiferigi Fotti.  
Dä het jo nüt aa und me gseet dr naggti Körper, s'isch zum gruuse,  
bietet dr Chef vo dr BVB dere Frau no aa, dass är will schmuuse.  
Das isch schiins nit nur unserem Lotti e so gange, was me so höört,  
das macht dr Baumi no bi ganz viilne Fraue, dä isch doch gstöört.  
Do gits au no d'Petra, s'Anni, s'Trudi, s'Eveline und no s'Antoinette,  
mit dene will dä Grüsel nit Fötteli duschle, sondern grad ins Bett.

Und duesch denn emool bitz in de Finance vo dr BVB ummeluege,  
merksch bi gwüsse isch nit alles sauber und s'laufft us de Fuege.  
Doo und döört koomischi und scheneroosi Ussgoobe s'isch e Schogger  
Reisespeese, Wohnigsköschte und no mee, s'Gäld sitzt äifach logger.  
Uf diggem Fuess hän do gwüssi abgrächnet, mängmol nit ganz dicht,  
d'Staatsaawaltschaft luegt jetzt alles genau aa und macht ihri Pflicht.  
Mir sin gespannt, was bi dr BVB no alles ans Liecht kunnt,  
doch für gwüssi Scheffe isch Schluss, sii driibes nümme z'bunt.

Die Arme sin d'Schoffööre vo de griene Flotte das hän mir vernoo,  
me het doch daatsächlich im letschte Joor dene dr Radio wäggnoo.  
Das Radiogrätli duet schiins nur bi dr Aarbet ablängge und stöört alli,  
wägg mit dere blöode Musikkische und zwar zaggig, dalli dalli.  
D'Gläidervorschrifte sin greeglet, das wird bi de BVB grooss ufbloose,  
äinhätliche Schue, Hoose, Pulli, Sogge und sicher no d'Unterhoose.  
Duet sich do öpper nit draa halte, git's e Ruffel und äini uf d'Kappe,  
Schaffsch nit nach de Voorschrifte, kasch dis Köfferli phagge.

Grossi Speese abrächne, digg woone und hindeduure Gschäftli mache,  
all das isch gang und gäb gsi bi dr BVB, es git no viil so Sache.  
Mit em Drämmli dirägg uf d'Reeperbahn ins Buff, s'glaubt uns käine,  
Luegsch unsere Waage aa, denn wäisch was mir mäine.  
Ändstazioon Reeperbahn, s'passt zum Skandal vom letschte Joor,  
wottschi Vetterliwirtschaft, bewirb di bi dr BVB s'isch woor.  
Stelle hets joo jetzt gnueg frei, das hesch überall könne läase,  
für äinigi isch's bi dr BVB z'Änd, me het ufgruumt mit em grosse Bäase.

Gäll, blybet sauber? Au ihr voo dr BVB...

E schööni Fasnacht.

[www.escargots-fratze.ch](http://www.escargots-fratze.ch)



Dä Zeedel isch druggt worde vo dr:

Werner Druck & Medien AG